



Tonga

**LAO (FAKATONUTONU) KI HE FILI FALE
ALEA 2014**

Lao Fika 5 'o e 2014



LAO (FAKATONUTONU) KI HE FILI FALE ALEA 2014

Fokotu'utu'u 'o e Ngaahi Kupu

Kupu

1	Hingoa nounou.....	5
2	Fakatonutonu ‘a e kupu 5.....	5
3	Fakatonutonu ‘a e kupu 5A.....	6
4	Kupu 10A fo’ou.....	6
5	Fakatonutonu ‘a e kupu 12.....	6
6	Fakatonutonu ‘a e kupu 13.....	7
7	Fakatonutonu ‘a e kupu 14.....	7
8	Fakatonutonu ‘o e Tepile.....	7



Tonga

LAO (FAKATONUTONU) KI HE FILI FALE ALEA 2014

Lao Fika 5 ‘o e 2014

KO HA LAO KE FAKAHOKO ‘A E NGA AHI LILIU KEHEKEHE KI HE LAO KI HE FILI FALE ALEA

‘Oku ou loto ki ai,
TUPOU VI,
‘Aho 20 ‘o ‘Aokosi 2014.

‘OKU TU’UTU’UNI ‘e he Tu’i mo e Fale Alea ‘o Tonga ‘i he Fakataha Alea ‘o e Pule’anga ‘o pehe:

1 Hingoa nounou

- (1) ‘E ui ‘a e Lao ni ko e Lao (Fakatonutonu) ki he Fili Fale Alea 2014.
- (2) ‘I he Lao ni, kuo pau ke ui ‘a e Lao ki he Fili Fale Alea 1989 ‘i hono fakatonutonu, ko e Tefito’i Lao.

2 Fakatonutonu ‘a e kupu 5

‘Oku fakatonutonu ‘a e kupu 5(5) ‘o e Tefito’i Lao ‘aki hono fakapekia ‘a e palakalafi (a) pea fetongi’aki eni -

- “(a) ke fakakau ha taha fili kuo fakangofua ke fili ‘i ha vahenga fili ‘i he vaha’a ‘o e ‘aho pulusi mo e ‘aho ‘e 14 kimu’a ‘a e ‘aho fili; pe”.

3 Fakatonutonu ‘a e kupu 5A

‘Oku fakatonutonu ‘a e kupu 5A ‘o e Tefito’i Lao ‘aki hono fakahu atu hili ‘a e ha hono ua ‘a e lea “vahenga fili” ‘a e ngaahi lea “kae fakakau ki ai ha taha fili kuo fakangofua ‘i ha vahenga fili ‘i he vaha’a ‘o e fili fakamuimui taha mo e ‘aho ‘e 14 kimu’a ‘a e fili-si’i”.

4 Kupu 10A fo’ou

‘Oku fakatonutonu ‘a e Tefito’i Lao ‘aki hono fakahu atu ‘i he hili pe ‘a e kupu 10 ‘a e kupu 10A fo’ou ko eni -

“10A Tolo’i ‘o e fili

- (1) Kapau ‘e ‘ikai lava ha fili ‘i ha fai’anga fili ‘o kamata pe kuo ta’ofi fakataimi koe’uhi ko ha fakatamaki fakaenatula, ‘ikai lelei ‘a e tu’unga ‘o e ‘ea pe ha ‘uhinga kehe, ‘e ngofua ki he Supavaisa ke toloi ‘a hono fakahoko ‘o e fili ‘i he fai’anga fili ko ia ki he ‘aho hono hoko, pea ka fiema’u mei he ‘aho ki he ‘aho kae ‘oua kuo lava ‘o fakahoko ‘a e fili, pea kuo pau, kapau kuo ne toloi ‘a e fakahoko ‘o e fili ke ‘oatu ha fanongonongo fakapule’anga ‘o e toloi ‘i ha founa ‘oku ne fakakaukau ‘oku fe’unga.
- (2) Neongo ‘a e kupu si’i (1), kuo pau ‘e ‘ikai fakaava ‘a e fili ‘o laka hake ‘i he houa ‘e 10 ‘i ha fai’anga fili.
- (3) Kapau ‘oku toloi ‘a e tapuni ‘o ha fili ‘i ha fai’anga fili ‘i he kupu ni ‘i ha lau ‘aho, ko e ‘aho totonu pe kimu’a ‘a ia ‘e ala fakafoki ai ‘a e Tohi Fekau kuo pau ke toloi ‘i he lau ‘aho tatau pe.”.

5 Fakatonutonu ‘a e kupu 12

‘Oku fakatonutonu ‘a e kupu 12 ‘o e Tefito’i Lao -

- (a) ‘aki hono fakapekia ‘a e kupu si’i (3) pea fetongi’aki eni -
 - “(3) Hili ‘a hono vakai’i ‘o fakatatau ki he tohi fakakatoa faka’osi ‘oku ‘i ai ‘a e totonu ‘a e taha fili ke fili, pea ko e ngaahi fakamatala fekau’aki mo e taha fili ‘oku fakatatau ki he ngaahi tu’utu’uni kuo fa’u ‘i he Lao ni, kuo pau ki he ‘ofisa fai fili ke ne kolosi ‘a e hingoa ‘o e taha fili ‘i he tohi fakakatoa, fakamo’oni ‘i he tu’a pepa paloti pea ‘oatu ‘a e pepa paloti kiate ia.”;
- (b) ‘aki hono fakafika fo’ou ‘a e kupu si’i “(6)” ko e kupu si’i “(7)”; pea
- (c) ‘aki hono fakahu atu ‘o e kupu si’i (6) fo’ou ‘o pehe ni -
 - “(6) Ka ‘i ai ha taha fili kuo te’eki ke ne fakahu atu ‘ene pepa paloti, ki he puha paloti, pea ‘oku ne fakafiemalie’i ‘a e ‘ofisa fai fili na’e maumau ‘a e pepa paloti tupu mei ha fehalaaki ‘e ngofua ke ‘oatu ha pepa paloti fo’ou, ‘o fakatatau ki he ngaahi tu’utu’uni kuo fakahoko ‘e he Komisoni.”.

6 Fakatonutonu ‘a e kupu 13

‘Oku fakatonutonu ‘a e kupu 13 ‘o e Tefito’i Lao ‘aki hono fakapekia ‘a e kupu si’i (2) pea fetongi’aki eni -

“(2) Kuo pau ki he ‘ofisa fai fili ‘o e vahefonua ‘oku nofo fonua fakataimi ai ha taha fili pehee ke ne tali ha fili pehee ka kuo pau ko e taha fili ko ia kuo lesisita ‘i he tohi fakakatoa ‘i he vahenga fili taau.”.

7 Fakatonutonu ‘a e kupu 14

‘Oku fakatonutonu ‘a e kupu 14(b) ‘o e Tefito’i Lao ‘aki hono tamate’i ‘a e ngaahi lea “faka’ilonga nima ‘o hono motu’a tuhu ‘i he pepa paloti mo e” pea fetongi’aki ‘a e ngaahi lea “fakamo’oni hingoa ‘i he”.

8 Fakatonutonu ‘o e Tepile

- (1) ‘Oku fakatonutonu ‘a e Sipinga 1 mo e 6 ‘i he Tepile ‘aki hono tamate’i ‘a e ngaahi lea “‘oku tautea ‘aki ‘a e” ‘i he feitu’u kotoa ‘oku ha ai pea fetongi’aki ‘a e ngaahi lea “pea tautea ke”.
- (2) ‘Oku fakatonutonu ‘a e Sipinga 4 ‘i he Tepile ‘aki hono tamate’i ‘a e ngaahi lea “‘a ia ‘e ala tautea ‘aki ‘a e” pea fetongi’aki ‘a e ngaahi lea “pea tautea ke”.

Na’e tali ‘e he Fale Alea ‘i he ‘aho 24 ni ‘o Sune 2014.